

**Vischnaunca da Mustér**

**Lescha dil  
dretg da burgheis**

**2019**

- 
- |      |    |                                      |
|------|----|--------------------------------------|
| Art. | 1  | Intent                               |
|      | 2  | Premissas per persunas digl exteriur |
|      | 3  | Premissas per persunas svizras       |
|      | 4  | Examinaziun                          |
|      | 5  | Taxas                                |
|      | 6  | Burgheis d'honor                     |
|      | 7  | Cumpetenzza e communicaziun          |
|      | 8  | Publicaziun                          |
|      | 9  | Mieds legals                         |
|      | 10 | Abrogaziun e vigur                   |

## Art. 1 Intent

Daventar burgheis dalla vischnaunca da Disentis/Mustér san burgheis grischuns e svizzers sco era persunas digl exteriur e persunas senza naziunalitad, aschinavon che las premissas legalas tenor dretg federal, cantunal e communal ein dadas.

## Art. 2 Premissas per persunas digl exteriur

<sup>1</sup>A **persunas digl exteriur** sa vegnir garantiu il dretg da burgheis communal, sche talas han giu lur domicil duront silmeins tschun onns ella vischnaunca da Disentis/Mustér. El mument cura che la persuna inoltescha la damonda d'impatriaziun, sto ella esser domiciliada silmeins quater onns senza interrupziun en vischnaunca. Plinavon ha ella d'ademplier las ulteriuras pretensiuns tenor legislaziun federala e cantunala dil dretg da burgheis.

<sup>2</sup>Importa il temps da domicil en vischnaunca en tut dudisch onns, tonschan dus onns domicil senza interrupziun en vischnaunca el mument dall'inoltraziun dalla damonda.

## Art. 3 Premissas per persunas svizras

<sup>1</sup>**Persunas svizras** che han habitau duront silmeins tschun onns ella vischnaunca da Disentis/Mustér, da quei ils davos treis onns senza interrupziun el mument dalla damonda, sa vegnir concediu ni garantiu il dretg da burgheis sche:

- a) gl'extract privat dil register penal svizzer cuntegn negin'inscripziun gravionta tenor la legislaziun cantunala;
- b) adempleschan lur obligaziuns finanzialas;
- c) retilan neginas prestaziuns socialas;
- d) han restituiu eventuals susteniments socials dils davos diesch onns.

<sup>2</sup>Importa il temps da domicil en vischnaunca en tut dudisch onns, tonschan dus onns domicil senza interrupziun en vischnaunca el mument dall'inoltraziun dalla damonda.

## Art. 4 Examinaziun

<sup>1</sup>La suprastonza communal examinescha las pretensiuns e fa ils sclariments necessaris.

<sup>2</sup>La suprastonza envida las **persunas digl exteriur** che fan ina damonda d'impatriaziun ad in discuors da qualificaziun, el qual surtut l'integraziun e las enconuschientschas previdas tenor legislaziun federala e cantunala dil dretg da burgheis vegnan examinadas. Fa ei basegns sa era in discuors cun persunas svizras haver liug.

## Art. 5 Taxas

<sup>1</sup>Per la lubientscha dil dretg da burgheis vegn incassau ina taxa che cuviera ils cuosts administrativs. La suprastonza communal relai in reglament corrispudent.

<sup>2</sup>La pauschala per cass sa vegnir differenziada per persunas svizras e digl exteriur. Per la reinpatriaziun sa vegnir applicau ina taxa reducida. Las pauschalas ein d'adattar periodicamein als cuosts effectivs.

<sup>3</sup>La suprastanza communal sa reducir ni relaschar las taxas per affons minorens, che vegnan buca tractai ensemen cun lur geniturs, per persunas en scolaziun sco era per cass specials.

## **Art. 6 Burgheis d'honor**

<sup>1</sup>En cass motivai sa la suprastanza communal conceder il dretg da burgheis d'honor.

<sup>2</sup>La surdada dil dretg da burgheis ei buca ligiada alla pretensiun da domicil.

## **Art. 7 Cumpetenzza e communicaziun**

<sup>1</sup>L'execuziun da questa lescha cumpeta alla suprastanza communal.

<sup>2</sup>Ella communicescha la decisiun d'ina damonda d'impatriaziun a scret. Decisiuns negativas ein da motivar.

<sup>3</sup>Sch'il petent havess d'haver obteniu il dretg da burgheis entras indicaziuns nunverdeivlas ni entras zuppar fatgs decisivs, rapporta la suprastanza communal quei al cantun entochen sil pli tard otg onns suenter ch'igl ei vegniu concediu il dretg da burgheis.

## **Art. 8 Publicaziun**

La suprastanza communal publichescha ils nums dils novs burgheis egl organ da communicaziun official dalla vischnaunca.

## **Art. 9 Mieds legals**

Encunter las decisiuns e disposiziuns dalla suprastanza communal sa vegnir recurriu enteifer 30 dis suenter la communicaziun tier la Dertgira administrativa dil cantun Grischun.

## **Art. 10 Abrogaziun e vigur**

<sup>1</sup>Questa lescha passa en vigur cun l'entschatta schaner 2019.

<sup>2</sup>Ella remplazza la lescha dil dretg da burgheis dils 27 da fevrer 2009.

Per la vischnaunca da Disentis/Mustér

Il president communal:  
Robert Cajacob

Il canzlist communal:  
Andri Hendry

Approbau dil cussegl da vischnaunca ils 14 da december 2018. Quella decisiun ei tenor art. 21 lit. b dalla constituziun communal vegnida suttamessa al referendum facultativ.